

Ils Basileis e lur preferenza per Grischuns

Gian-Reto Plattner ed Anita Fetz èn omadus politichers grischun-basilais

DA CLAUDIA CADRUVI / ANR

■ Sto esser ch'ìls votants da Basilea han gugent ils Grischuns. Co auter fissi uschiglio pussaivel che Basilea trametta gist dus politichers cun ragischs grischunas en il parlament a Berna. I sa tracta da la cussegliera nazionala Anita Fetz e dal cusseglier dals chantuns Gian Reto Plattner. Omadus politiseschan en l'ala sanestra. Plattner è quest onn anc il president dal cussegl dals chantuns. Sch'el discorra cun insatgi dal Grischun, mida Plattner automaticamain en il «Churerdütsch». Ses dialect tuna, sco sch'el n'avess mai bandunà il Grischun. Dasperas

è el creschì si en la Bassa. Tuttina ha el pudì mantegnair il dialect da ses geniturs. «Nus essan adina stads en vacanzas en il Grischun», declera el sia abilitad. Ma per mussar ch'el saja era in veritabel Basileis aschunta el intginas construcziuns en il pli schuber dialect basileis.

Num rumantsch

Ch'el ha in num rumantsch, po Plattner engraziar a sia mamma ed a sia nona. Plattner sa regorda bain che las duas dunnas discurrivan adina rumantsch. La nona aveva num Ottilia Pernisch, derivava da S-chanf ed ha maridà in Bernhard da Cuira. Il prenum da la mamma era Elisabeth. Ella è daventada giurista.

Ils lioms cun l'Engiadina ha Plattner mantegnì fin oz. La chasa da S-chanf en la via Maistra 32, che la nona aveva ertà, è anc oz en possess da la famiglia.

Ils Plattners derivan dad Untervaz. Il bab da Gian-Reto Plattner è stà chemicher. El aveva num Placidus Plattner ed è creschì si a Cuira. Pli tard ha el vivì a Geneva ed a Basilea. Il tat aveva medemamain num Placidus. El è stà a sias uras schefmedi al Spital da la Crusch a Cuira. E per finir anc il basat: Lez è stà cusseglier guvernativ en il chantun Grischun. Ma atenziun! L'avaina politica da Gian-Reto Plattner na deriva betg sulet da vart dal bab. Era da vart da la mamma da Plattner hai gi glieud cun sang politic. Ils Bern-

hards han politisà a Cuira ed Elisabeth, la mamma, è gia baud s'engaschada per il dretg da votar da las dunnas.

Tuts han num Placidus

Tut tenor la tradiziun da famiglia ha Plattner anc in terz prenum, numnadamain Placidus. Quest num ha el era dà enavant a ses figl. Era la derivanza grischuna mantegna il politicher da Basilea vinavant. «Jau hai mai ponderà da midar il dretg da burgais, era sch'i ma plasha fitg bain a Basilea.»

En ina columna en la «Südostschweiz» ha Plattner ina giada scrit ch'ìl Grischun saja represchentà surdimensiunadamain en il cussegl dals chantuns. Empè da dus represchentants, haja il Grischun gist trais politichers grischuns en la chombra pitschna. El scriva: «Jau na sai betg tge lioms che nus avain. Ma inasatge è franc: Sch'i va per il Grischun, lura tegnain nus ensemen: Christoffel Brändli, Theo Maissen e Gian-Reto Plattner. Nus, ils trais represchentants dal chantun. Nun che nus na fissan betg exact dal medem meini, e gliez e tranter la pps, la pcd e la pss bunamain adina il cas!»

Dunna da Domat en il cussegl dals chantuns

Tenor quella teoria ha il Grischun pia in politicher dapli a Berna. Per quest onn è quel politicher schizunt anc a la testa da la chombra pitschna. Suentar vul Gian-Reto Plattner sa retrair da la politica. Tuttina na perda il Grischun forsa betg ses «terz mandat». La cussegliera nazionala Anita Fetz vul numnadamain d'averter successura da Gian-Reto Plattner. Quest'emna han ils socialdemocrats da Basilea fatg enconuscent ch'els lessan metter si Anita Fetz sco candidata per la chombra pitschna. La nominaziun uffiziala succeda dentant pir il matg a la radunanza da delegads da la pss basileisa. Anita Fetz, l'anteriura politica da la Poch, fiss burgaisa da Domat.



Forsa daventa Anita Fetz l'onn proxim la terza Grischuna en il cussegl dals chantuns.

KEYSTONE